

ALAHADY - SAMPANKAZO - TAONA A



FANDINIHANA NY FIJALIAN'NY TOMPO

Ry Kristianina havana, miditra amin'ilay herinandro lehibe amin'ny tantaram-pamonjena antsika isika amin'izao Alahady fahatsiarovana ny nidiran'i Jesoa tamim-boninahitra tao Jerosalema izao

Vakiteny I : Iz. 50, 4-7

Tononkira : Sal. 21,

Vakiteny II : Fi1. 2, 6-11

Evanjely : Mt. 26, 14 – 27, 66

izany hoe ny Alahadin'ny Sampankazo araka ny mahazatra antsika. Araky ny averimberina matetika amintsika dia tsy hoe mahatsiaro fotsiny ny zavatra nitranga tamin'izany fotoana izany isika rehefa mankalaza fa noho ny fanentanan'ny Fanahy masina

dia mivelona azy ary dia izany no irin'ny Eglizy sy anentanany antsika amin'izao Herinandro masina izao. Misy akony manokana izao fankalazana ny fototry ny Misterin'ny Famonjena antsika amin'izao fiatrehantsika ny Sinaody izao satria ny tanjona dia ny hahatonga antsika ho EOY, ho Eglizy Olo velomin'ny Batemy miombona miara-dalana mandray an-tanana zary Misionera Tabernakla velona. Koa izao fankalazantsika an'i Jesoa miditra ao Jerosalema izao no mahatonga antsika manambara fa ny Alahadin'ny sampankazo dia manambara ny fidiran'ireo olona tao Jerosalema nitondra sampakazo nitsena an'i Jesoa. Niara-dia tamin'i Jesoa izy ireo niditra tao Jerosalema sady nandray azy ho mpanjaka.

Mpanjaka tokoa I Jesoa, miditra amin'ny renivohitry ny fanjakany izy dia i Jerosalema ilay tanànan'ny fiadanana, tanàna masina, ka isika koa ry Kristianina havana miaraka amin'i Jesoa isika androany miditra ao Jerosalema mihorakoraka miaraka amin'ireo Jody tamin'izany fotoana izany ka manao hoe : HOZANA HOZANA. Mitodika manokana aminareo tanora aho. Niangavianareo mba ho andron'ny Sinaody ity andro ity eto amin'ny diosezy. Izany hoe irinareo hiara-dalana tokoa ianareo miaraka amin'I Jesoa ka tianareo ho i Jesoa no manjaka amin'ny fiainanareo. Aoka hanararaotra ity herinandro lehibe ity ianareo Tanora hibanjina an'I Jesoa mahafoy sy manompo. Enga anie isika hianatra Azy sy hanahaka Azy.

Tsarovy fa rehefa mahomby ny asa tanterahintsika dia tsy mitsahatra isika ny mihoby, fantaro koa anefa ry Kristianina havana fa io no tena zava-dehibe sy fototry ny fampianarana tian'ny Eglizy hosainintsika androany. Raha i Jesoa miditra ao Jerosalema dia midika fa miditra amin'ny famonjena antsika izy. Manomboka amin'izay fankalazana ny fidirany tao Jerosalema izay ny Herinandro masina izay ho vakivakiansika. Hohenointsika tsara ireo tenin'Andriamanitra ho vakina amintsika mandritra an'izany fotoana izany mba ho tonga nofo ao am-pontsika amin'izay dia hiara-miditra amin'i Jesoa ao Jerosalema koa isika.

Ny fidiran'i Jesoa ao Jerosalema dia manambara fa tsy lavitra Izy, izany hoe miditra amin'ny fiainantsika, ilay Jerosalema tanàna masina, tanànan'ny fiadanana Izy raha manaiky ny hiara-miditra aminy isika ka hamono ireo fahotana izay mikiky ny fiainantsika izay mahatonga an'ireny korontana, adiady sy herisetra ireny. Lasa mifanipaka toy ny valala an-karona isika ka mifanapotika, izay no anton'ny nidiran'i Jesoa amin'ny fiainantsika mba hanapotika an'ireny fahotana ireny, nanaiky ho fahotana Izy izay tsy mpanota mba hanafaka antsika amin'ny fahotana.

Ry Kristianina havana ny dikan'izao fitazonantsika ny sampankazo izao dia manambara ny finoantsika an'i Jesoa ilay hiditra amin'ny fiainantsika tokoa ary izany no irintsika amin'izao fankalazana ny herinandro masina izao. Jesoa mpiara-belona amintsika no hanapotika an'izay ratsy rehetra ka hanangana antsika amin'ny tsara ary ny tsara no mahatonga antsika ho zanak'Andriamanitra. Miara-belona amintsika Izy, miara-miaina amintsika, miara-dàlana amintsika ka miroso hatrany isika amin'izao fidirantsika amin'ny herinandro masina izao. Anjarantsika fa indrindra isika tanora no ho Jesoa Mpiara-belona amin'ny olona amin'izao androntsika izao. Aoka ho vonona hanambara ny finoana isika na dia mety hatrika zavatra sarotra aza.

Izany no ambaran'ireo tenin'Andriamanitra amintsika amin'izao Alahadin'ny Sampankazo izao : ny Vakiteny voalohany dia ny tantaran'Izaia mpaminany manambara fa i Jesoa dia tsy lavitra antsika fa nandray ny rofintsika rehetra « *Tsy nafeniko tamin'ireo nandatsa ahy ny tavako ary fantako fa tsy ho menatra aho* »

Ny Andriamanitsika dia Andriamanitra nandray ny rofintsika rehetra, izay rehetra mahamenatra antsika dia ny fahotana izany, avy amin'ireny no nipoiran'ny famonjena eo amin'ny fiainantsika rehetra.

Fampianarana velona ho antsika izany ka aza matahotra isika miatrika ireny adim-piainana sy fanapotehina isan-karazany ireny. Aoka isika ho vavolombelona tsy hatahotra sy tsy ho menatra hanambara mandrakariva ny finoantsika.

Nanamafy koa i Md Paoly ho an'ny Filipianina ao amin'ny vakiteny faharoa nilaza fa nanaiky nilatsaka amin'ny farany ambany i Jesoa mba handray antsika rehetra sy mba hampiakatra antsika ho eo amin'ny fiainana tsaratsara kokoa dia tsy inona fa ny hahatonga antsika ho zanak'Andriamanitra : *« Manana ny toetra maha Andriamanitra azy tokoa i Jesoa nefa tsy noheveriny ho izay no zava-dehibe fa nialany izany ka naka ny fomban'ny mpanompo izy mba hanandratra antsika ho zanak'Andriamanitra »*

Izany tokoa ny lalana tsy maintsy hzorantsika amin'izao fidirantsika amin'ny herinandro masina izao : manana fanentren-tena, manaiky ho mpanompo hanasoa ny hafa, izany no dikan'ny famonjena fanasoavana antsika. Ny hanasoa ny hafa tokoa no antom-pisiansika amin'ny maha-kristianina antsika.

Ry Kristianina havana, ny Evanjely androany dia lava be satria vakiana daholo ny fitantarana ny fijalian'i Jesoa izany hoe ny fanompoan'i Jesoa antsika ilay nidinany amin'ny farany ambany. Hitantsika ireo sokajin'olona maro samihafa niaina sy niatrika nanomboka tamin'ny nihobiana an'i Jesoa ho mpanjaka ka hatramin'ny namantsihana azy teo amin'ny hazo fijaliana. Io no tian'ny Eglizy ho tsapantsika matoa novakiana manontolo ny Evanjely androany na dia lava aza. Aiza amin'ireo olona maro samihafa ireo ny toerantsika ? Ao ireo Jody izay nanao hoe : “ HOZANA, HOZANA” nefa avy eo nanao koa hoe “FANTSIHO, FANTSIHO”, aiza no misy antsika ? Tahaka an'i Piera izay nandà in-telo kanefa nibebaka ihany koa ve sa tahaka an'i Jodasy izay namadika? Anjarantsika amin'izao fidirantsika amin'ny herinandro lehibe amin'ny famonjena antsika izao ny mandinika ny fiainantsika satria io fiainantsika io no manambara ny fidiran'i Jesoa ao Jerosalema.

Vao avy nankalaza ny pelerinajy tany amin'ny “montagne de français” isika, hitantsika avy teny ambony teny ny tanànantsika, ka amin'izao àry asain'ny Eglizy isika hiditra amin'ny fiainantsika, hiditra amin'ny fiainam-pianakaviansika miaraka amin'i Jesoa mpiara-belona amintsika. Araky ny voalazan'i Md Paoly nanaiky ho farany ambany i Jesoa mba hamonjena antsika, mpiara-belona amintsika tokoa izy, tsy nanafina ny tavany na ny sôrany izy, nopotipotehina ny endrika maha-Andriamanitra Azy mba hahatonga antsika ho endrik'Andriamanitra. Tsy maintsy potehintsika ny fahotana, ny ratsy mba handraisantsika ny tsara.

Hararaoty àry ry Kristianina havana izao herinandro lehibe izao hihavanantsika amin'Andriamanitra, sy amin'ny mpiara-belona amintsika ary amin'ny tontolo manodidina antsika.

Inona ny dikan'izany fihavanana izany ? Hanaja ny maha-zanak'Andriamanitra antsika isika sy hivelona an'izany satria raha miara-maty amin'i Kristy amin'ny fahotana isika dia hiara-hitsangana Aminy koa amin'ny Paka izay hitondra antsika amin'ny fiadanana dia ilay Jerosalema tanàna masina sy fiadanana. Ny Paka dia hitondra antsika amin'ny fiadanana tena izy, izany hoe hiara-belona amin'i Jesoa fiadanana isika ka ho eo anivon'ny Eglizy kely, fianakaviana ny fiadanana, ho eo anivon'ny fiaraha-monina, amin'ny toeram-piasana, any amin'ny sekoly, any amin'ny Eglizy iraka, ny Eglizy fototra, ny Eglizy fiombonana. Tsy fihavanana amintsika ihany sy fihavanana amin'Andriamanitra ihany fa fihavanana amin'ny tontolo iainana izay maheky mijaly noho ny hetraketra avy amintsika olombelona. Mitaky fiovam-penitra mahery vaika amintsika izany mba hanaja ny zava-boary isika.

Izany no Paka ankalazaintsika amin'ity 2023 ity araka ny tapany faharoa amin'ny Sinaody :
FIANAKAVIANA EGLIZY KELY MIARO NY TONTOLO IAINANA.

Enga anie hiara-hiditra amin'i Jesoa ao Jerosalema isika ka hiara-hitsangana Aminy tokoa ka ho Jerosalema vaovao no hiainantsika ilay Batemy hohavaozintsika amin'ny Sabotsy masina. Ny toky nataontsika tamin'ny batemy dia batemy ivelomantsika miaraka amin'i Jesoa mpiara-belona amintsika. Masina Maria izay niara-dalana tamin'i Jesoa hiaraka amintsika mandritra ity Herinandro Masina ity fa indrindra ianareo Tanora ka hanampy antsika ho Mpamafy fihavanana sady kristianina no malagasy ka hiova ny fiaraha-monintsika, fiaraha-monina anjakan'ny rariny sy hitsiny. Md Josefa ilay Lehilahy Marina, hanabe antsika hijoro vavolombelon'ny marina satria tsy mahantra harena I Madagasikara fa mahantra olomarina. Amen

Mompera Arseveka Mgr Benjamin Ramaroson